

張文襄公電奏



張文襄公全集電奏目錄

起卷七十三  
訖卷八十五

電奏一

光緒十年閏五月份一件

光緒十年六月份四件

光緒十年七月份四件

光緒十年八月份六件

附來電一件

光緒十年九月份七件

附來電二件

光緒十年十一月份二件

附來電二件

光緒十年十二月份十二件

附來電三件

光緒十一年正月份十六件

附來電七件



電奏二

光緒十一年二月份十七件

附來電二件

光緒十一年三月份二十二件

附來電三件

光緒十一年四月份十三件

附來電三件

電奏三

光緒十一年五月份二件

附來電一件

光緒十一年六月份五件

附來電一件

光緒十一年七月份三件

附來電二件

光緒十一年八月份一件

附來電一件

光緒十一年九月份一件



光緒十一年十月份二件 附來電二件

光緒十一年十一月份五件

光緒十一年十二月份二件 附來電三件

光緒十二年正月份三件 附來電一件

光緒十二年三月份二件

光緒十二年四月份一件 附來電一件

光緒十二年六月份一件

光緒十二年七月份一件 附來電一件

光緒十二年九月份一件 附來電一件

光緒十二年十月份一件



光緒十二年十一月份三件

附來電一件

光緒十三年正月份四件

附來電一件

光緒十三年二月份一件

附來電一件

光緒十三年三月份五件

附來電一件

光緒十三年五月份三件

電奏

四

光緒二十年七月份五件

光緒二十年八月份五件

光緒二十年九月份十一件

附來電三件

光緒二十年十月份十五件

附來電七件



光緒二十年十一月份九件

附來電二件

光緒二十年十二月份六件

附來電一件

電奏<sub>五</sub>

光緒二十一年正月份十一件

附來電六件

光緒二十一年二月份十五件

附來電六件

光緒二十一年三月份十二件

附來電四件

電奏<sub>六</sub>

光緒二十一年四月份十三件

光緒二十一年五月份五件

附來電四件

光緒二十一年閏五月份二件



光緒二十一年六月份五件

附來電五件

光緒二十一年七月份十一件

附來電三件

電奏七

光緒二十一年九月份二件

附來電一件

光緒二十一年十月份四件

附來電五件

光緒二十一年十一月份二件

附來電一件

光緒二十二年二月份一件

光緒二十三年正月份一件

光緒二十三年三月份三件

附來電二件

光緒二十三年四月份三件



光緒二十三年十一月份一件

光緒二十三年十二月份八件  
附來電一件

光緒二十四年正月份四件

光緒二十四年二月份一件  
附來電一件

電奏

八

光緒二十四年閏三月份三件

光緒二十四年四月份一件

光緒二十四年七月份三件  
附來電二件

光緒二十四年八月份四件

光緒二十四年九月份一件  
附來電二件



光緒二十四年十月份一件

光緒二十四年十一月份二件  
附來電一件

光緒二十四年十二月份一件

光緒二十五年正月份一件

光緒二十五年六月份一件

光緒二十五年十月份一件

光緒二十五年十二月份一件

光緒二十六年五月份三件

光緒二十六年六月份六件

電奏  
九



光緒二十六年七月份四件

光緒二十六年八月份三件

光緒二十六年閏八月份三件

光緒二十六年九月份二件

光緒二十六年十月份三件

光緒二十六年十一月份四件  
附來電一件

光緒二十六年十二月份三件  
附來電一件

電奏十

光緒二十七年正月份六件  
附來電七件

光緒二十七年二月份九件  
附來電三件



光緒二十七年三月份六件  
附來電一件

電奏十一

光緒二十七年四月份七件

光緒二十七年五月份三件

光緒二十七年六月份一件  
附來電一件

光緒二十七年七月份一件

光緒二十七年八月份二件  
附來電一件

光緒二十七年九月份五件  
附來電二件

光緒二十七年十月份三件

電奏十一



光緒二十八年四月份四件 附來電四件

光緒二十八年六月份六件 附來電五件

光緒二十八年七月份二件 附來電一件

電奏十三

光緒二十八年八月份一件 附來電一件

光緒二十八年九月份三件 附來電一件

光緒二十八年十月份一件

光緒二十八年十一月份一件

光緒二十九年正月份三件 附來電一件

光緒二十九年二月份一件 附來電一件



光緒三十年二月份一件

光緒三十年三月份一件

光緒三十年四月份一件

光緒三十年六月份二件

光緒三十年七月份一件

光緒三十年八月份一件

光緒三十年十月份一件

光緒三十年十二月份一件

光緒三十一年三月份一件

附來電一件

光緒三十一年六月份一件



光緒三十一年七月份一件 附來電一件

光緒三十一年八月份一件

光緒三十二年四月份一件

光緒三十二年五月份一件

光緒三十二年十月份二件

光緒三十二年十一月份一件

光緒三十三年三月份一件

光緒三十三年五月份一件 附來電一件

光緒三十三年六月份一件 附來電一件

光緒三十三年八月份一件



電奏目錄終



張文襄公全集卷七十三

電奏一

致總署

光緒十年閏五月三十日發

法既明言專占中國口岸此時彼兵輪進各海口必須  
攔阻祈速與該公使議定并託各國公使公論以便速  
飭各口設備若不照會明白攔阻則開衅聽人則失險  
必致自誤粵省惟有守口門扼內河船達城下戶稠垣  
卑無從措手再劉永福法必不容然萬不可不庇雲南  
恐不易安頓洞意願招納之劉本欽州人若令率所部  
精銳歸粵果使爲將領既免法吞且資其力必有大益



兩事均祈代奏請旨望電復卅

致總署 光緒十年六月初五日發

岑電稱閏五月初八日奉旨由粵轉咨到營已遵飭前敵各營扼紮原處嚴加防備并催續調各營挑派附近鄉團共三四萬人預備戰守約六月底可到俟奉旨進兵定卽親統進發馳赴前敵與粵軍聯絡相機攻取如法人由大灘文盤州一路來攻保勝卽督飭各營極力堵剿斷不鬆勁祈轉電總署先行復奏等語謹轉達尾

致總署 光緒十年六月十二日發

屢接閩電情形危急船廠若擾各處皆震合懇南北洋



飛速各派數艘帶水雷艇合力援閩法注意在閩敵入  
內河頗慮斷後故大小船分屯五虎門內外若有十船  
於口門外遙尾綴之勿與搏戰待敵入內則下雷於口  
門斷之欲犯他口亦然往南亦南往北亦北處處作勢  
牽制則各口皆不敢深入此十船可作十萬人之用南  
北各口皆有大益非獨爲閩也惟必須十艘八艘少則  
無益水雷艇尤要事急敬陳管見祈鈞署代奏請旨速  
行文

致總署

光緒十年六月十七日發

奉旨援閩粵兵不敷閩事甚危移緩就急潮去閩近已



令署提督方耀飛調遊擊方恭率潮勇五營往援潮防  
舊有三營趕募步勇一營水勇一營舊營續募補足軍  
火暫挪應用粵墊兩月餉及船費由汕頭舟行至廈門  
能否搭船入口相機前進舟行自廈一日到福州陸行  
八日到福州請代奏玉麟樹聲之洞文蔚同肅霰

致總署

光緒十年六月二十一日發

敵既襲臺今又萃閩情形危急仰懇 聖上速決戰和  
之計電諭沿海各省使有遵循得以相機制敵不然處  
處落後受制敵已深入內河彼儻據險開礮疆事危矣  
迫切合詞籲祈代奏請訓示玉麟樹聲之洞文蔚同肅



致總署

光緒十年七月初一日發

奉敕籌濟銘營軍火竭力搜得卑鉢北洋步一千二百枝馬子五十二萬礮藥一萬二十磅并協餉銀二萬兩雇船徑送淡水後日抵臺臺人能戰有餉械可就地募吳宏洛守長泰最衝無可代撥老營太多粵可慮竊思臺鎮章高元卽銘軍親兵章部二營在臺餘八營現紮江陰皆曾隨唐定奎渡臺者此八營不惟銘部且恰是章部若抽數營由滬雇船援臺地熟將習尤相宜昨電旨派程文炳由江西援閩路遠難達若令章部援臺程部紮江陰自漢口下三日可到似便再温州鎮吳鴻源



隨左相在閩會駐臺熟悉聞素稱謀勇部下多戰士現  
告病居廈門可否令吳鴻源或在厦募數營援臺或徑  
赴臺募數隊敬陳管見請代奏之洞文蔚同肅東

致總署

光緒十年七月初一日發

臺防自應赴援粵海口太深廣防遏最難長洲扼要吳  
宏洛築臺甫竣萬難移動前已撥潮防五營今再移五  
營粵事港報畢登昨日西人言法正謀設法擣粵敵乘  
虛粵危矣粵爲南洋衝尤要於臺他軍均難抽撥且於  
臺地主將均不習往亦無益現已力籌餉械濟臺聽劉  
自募聞臺軍二萬餘兵不少需將與械耳軍火最難措



如戰旨尙未宣祈飭南北洋速向洋行定買餌以重利  
商令設法通融送來爲要請代奏玉麟樹聲之洞文蔚  
同肅朔

致總署

光緒十年七月初四日發

率敵以戰越爲上策圖越以用劉爲實濟前奉旨籌牽  
制之策粵東雖有兵七枝惟欽廉非進兵之路查主事  
唐景崧與劉永福相得久在越地前敵熟悉地勢軍情  
乞假在龍州現聞病愈洞已電致唐令速募四營出關  
與劉永福合犄角一面趕籌餉項軍火濟之餉一到卽  
可進兵并助劉永福餉一萬兩交唐帶往傳述天恩激



廣會戰此枝似較生兵爲便請代奏豪

致總署 光緒十年七月初七日發

電旨命張前督防廣西後路張自擬遵往惟勢有難行  
往必帶淮軍及淮軍所部粵軍諸營分守要地猶不敷  
臺壘器械均整練募新必不得力吳安洛部尤難動前  
電奏已詳一張熟粵情可資商酌在此督率淮部諸將  
易盡力二不予舊部隻身往無用三即使可往赴西十  
數營無餉防東募填者無械萬無從辦四案越關外荒  
苦逃匿西軍萬餘轉運艱多食粥再增大軍不戰已困  
五粵東戒嚴萬緊敵船一駛各自顧後路疎前敵張會



兩請出關今昔殊勢東急西緩我援敵乘仰懇天恩留  
張仍防粵東至幸若慮西防或飭西提唐仁廉赴任臨  
戰宜靜不宜動合詞籲請代奏玉麟之洞文蔚同肅遇  
致總署

光緒十年八月初一日發

奉七月二十一日電旨令防由澳門陸路窺省詳查澳  
門至香山有陸路香山至省多支河無陸路惟聞有雇  
奸民乘小船分擾之說當密查嚴備粵省海口除虎門  
外尙有五門河道紛歧深廣三門可進大輪若中號輪  
皆可深入達省惟有於附省衝要扼守但河無戰船岸  
無礮臺謹當竭力籌辦請代覆奏玉麟樹聲之洞文蔚



同肅朔

總署來電

光緒十年七月二十二日到

奉旨聞法國現與葡萄牙密約澳門有通廣東省旱路擬由此路協力攻撲省城如果得手卽將法國所有澳門地界酬葡等語雖係傳聞之詞不可不防著彭玉麟張之洞等嚴密偵探並查明此段旱路有無險隘可憑聞中間尙有一江或可扼守著豫籌布置並先電聞欽此箇

致總署

光緒十年八月初一日發

潘上月十六駐諒山岑駐保勝遣將會劉永福攻宜光



惟永福一人蒙恩部下未與若黃守忠等屢戰功多永福深倚擬請敕永福酌保部下將弁准請總兵以下二十三人擇尤附電代奏庶可共奮越官黃廷經現收眾自保可否敕潘查詢如願爲華官亦懇恩施再越王於閏五月又爲其下所酖謹附陳祈代奏請旨玉麟之洞同肅朔

致總署

光緒十年八月初十戌刻發

疊奉電旨飭速辦雲桂電綫查龍州至馬白關幾二千里山僻運料艱滯估費約十六萬以外官出無商助勘路購料竣工約十閱月事不易集冀雲桂會軍後信息



較便俟岑潘會商覆陳遵旨一面奏聞請代奏蒸

致總署

光緒十年八月十六日戌刻發

數日前香港華民密約燬法船英助法防乃止前法船  
在港買牛羊民艇不載鐵甲傷民工不修近法商船到  
民艇不起貨英官執而罰之眾艇怒挑夫助之艇夫避  
匿停工中外貨皆不搬運英官還所罰仍不允英以兵  
脅斃華人一英兵傷十一益開揚言將焚港中法行今  
晨舂米工亦停刻尙未結英不能制其眾疑粵省官主  
使示禁接濟受雇充匠當兵誠有之然只貼粵境港地  
不能貼華示貧苦細民一日不備則因此民心忠義非



官力若日內不了港官必喉巴夏里瀆擾望折駁勿聽  
卽以民心忠義不願受役敵國爲詞情理正大彼必不  
能奪謹先上聞請代奏諫

致總署

光緒十年八月二十一日申刻發

香港艇夫拒法事相持數日西街罷市各行傭作以次  
和之英官兵脅不從揚言焚港九龍司會匪欲爲助英  
人甚恐洞密電港商勸導令適可卽止醫院華人調處  
英官還所罰錢放所拘人所斃華民卹二百元聽華民  
不裝法貨乃已十八日事定十六日法船二由鷄籠來  
港采辦火食華商不交易十七日卽赴西貢采辦十八



日又自鷄籠來法船一廿日亦往西貢此事乃民義憤英極力抑民助法畏眾曲從恨粵官甚指爲主使昨照會詰問以港事粵官力不能及答之頃接西電利士卑攻淡水法船不能進內只口外一礮臺被燬法兵現短糧等語果能香港從此不接濟法船於敵亦頗有滯礙粵省窮民忠義難得事定後當酌籌獎勵之法上聞請代奏馬

致總署

光緒十年八月二十二日已刻發

法踞鷄籠劉守淡水南北洋當已奏聞兩奉電旨接濟遵已赴港設法雖在海梗必當力籌妥再具奏竊謂臺



事孤危外援難往惟有以臺守臺臺地戰士銀米皆不  
缺惟缺軍火向多富戶豪民臺北林姓曾集團萬餘助  
戰此時鷄籠之寇宜急圖攻逐勿令久踞敗謀兵力不  
敷可否仰懇聖恩敕臺灣紳民如有能起義糾眾逐  
法人出臺境者封以五等之爵團勇仍予優保重賞所  
費口糧成功後報明補發捐餉者減成從優給獎成功  
後并免臺地錢糧一年若臺民并力當可驅法團雖遜  
於兵勇取其勢眾洋兵最患夜戰不得眠息若分爲十  
餘起分路更番日夜擾敵疲其兵力耗其子藥數日法  
必困官軍乘之然後可勝并祈敕諭臺灣鎮道分投籌



辦事急至此非破格爵賞不能鼓眾心破強敵果能成功豈在黃梧施琅李長庚諸人下此皆閩臺成案祈聖裁速行臺防幸甚請代奏養

致總署

光緒十年九月初二日戌刻發

八月廿八日一大法船運糧到港次日赴鷄籠廿九日一小法船到港兵約二百皆自海防來西報法議籌餉三十七兆佛郎又稱添四鐵甲來華又稱德相畢士馬赴法都約助法圖利欲在華與英法美三國同有租界今俄來華鐵艦三日本亦來華兵船三廿四日澳門葡人忽增一大兵船泊九州洋以二十萬自日本租來兩



年爲期諸番合從大局可慮竊思添一德國租界於我  
無損彼有大益以此餌德懇其助我或可稍解可否與  
駐京德使議并敕駐德李欽使探之此事是否可行請  
敕總署與北洋速議祈代奏冬

致總署

光緒十年九月初二日戌刻發

頃接劉永福稟感激天恩備訴艱苦部下食粥餉乏彈  
缺俟秋清水落進取宣光并云前蒙恩賞十萬金祇領  
得三萬有奇雲南軍火餉項旱道不易難多接濟祇須  
餉足加募精銳無堅不破非法人有神術也等語查十  
萬未能全領自係因彼時桂餉難籌今雲軍餉械亦絀



竊有管見昨接晉奎署撫咨籌銀十萬解部備賞可否  
懇恩卽將此項賞劉永福分作兩次先賞五萬如獲大  
捷再賞五萬必當鼓舞至軍火粵當力濟刻下蘇提雖  
勝他軍傷亡太多法虜決意分路攻逐桂軍寇悍我孤  
必須岑劉由西路夾攻庶分敵勢如蒙俞允請敕粵海  
關於應解南北洋經費下卽日全數撥解再由部將此  
項發兩洋作抵伏望聖裁速行請代奏沃

總署來電

光緒十年九月初四日酉刻到

本日奉旨聞劉永福軍缺餉加恩賞銀五萬兩著張  
之洞無論何欸卽行解交岑毓英傳旨賞給前令酌



保黃守忠等尙未奏到並飭速奏刻已秋深瘴退傳知該提督剋日進勦攻復各城渥膺懋賞此旨著張之洞轉咨岑毓英遵照欽此豪

致總署

光緒十年九月初九日子刻發

關外軍情敵分三路船頭一路蘇軍屢勝多傷與敵相持郎甲一路方友升周壽昌營單勇病致敗退紮觀音橋那陽一路教匪焚老街未來犯王德榜派兩營駐鎮南關唐主事景崧八月廿日出關由牧馬蘇街赴宣光會劉軍潘以諒山急留唐暫防牧馬現屬調他營防促唐進至雲軍在宣光被挫一節桂探西報皆無聞岑派



同知潘濟德三營同劉部黃守忠圖宣光然唐初五電  
尙無雲軍東來的信敗恐不確參考西報桂軍皆血戰  
火器不敵教匪過眾故雖勝而多損張前督本日申刻  
病故署瓊州鎮吳全美亦於八月病故港連日有法小  
兵船四昨一艘赴雞籠大率資彼煤糧阻我濟械法封  
全臺口禁華人及書信登岸請敕總署南北洋力商各  
國商船謀探信之策至要請代奏佳

致總署

光緒十年九月十二日酉刻發

潘疊電餉缺甚本省款月僅二萬餘至協餉四萬罕解  
賞卹更無出情詞危苦蘇提欲收散勇爲用而爲餉所



因岑亦憂無餉竊謂援臺惟有爭越內地增百營不如關外增十營內地用餉百萬不如關外用餉十萬仰懇敕催雲桂兩省協餉桂責湘墊雲責川墊再由他省撥還或可稍速潘以瘴兼急而病洞前聞人有頗議之者詳察其情略因餉絀諸事力求撙節所致此乃邊臣苦況請代奏懇恩速行文

致總署

光緒十年九月十九日已刻發

十日內自西貢來港大兵船三小兵船一大者載兵各數百先後皆赴臺現有自臺來大兵船一泊港詳考兩月內過港各船名惟一艘新自西貢來餘皆前在閩臺



海面者往來港越運兵械煤糧兵增而船未增西報法於初五日據雞籠煤鑛然各船在港實極力裝煤法以二十船縱橫中國海面禁封臺閩狂悍實堪髮指昨知敕南北洋撥船援臺如能達臺固善但我船自滬廈開行敵已早知難繞他口調船攔截仍難近岸中國戰船不多尤須寶惜似不如於閩海一帶結隊游弋截彼運兵運煤糧船較易得手近兩月來自港自越運船來往絡繹率皆一兩艘游行無忌我以八九艘遇之卽彼不被擊壞亦必退避敵運旣阻擾臺之寇不能持久且兵械不添亦難進攻如此互相劫制或可有益可否敕下



左楊等酌辦請代奏效

致總署

光緒十年九月二十日午刻發

電旨恭悉臺事甚急晝夜憂憤前疊奉旨濟臺軍火已購備前膛洋槍千枝洋藥數百桶託人向港厦多方商辦餌以重價擬俟能解再奏聞無如各船皆不往法於華洋船皆禁阻搜查書信拋棄民船被擄甚多取壯者剪髮充兵臺礮多硝少然硝易煎取八月十六日洞卽電劉督辦囑造土藥以圖持久此電已達九月十一十三復電劉及臺灣道力言並商運濟事不知達否粵無兵輪七月初九日已奏聞援兵實不能往麟雖隻身赴



閩會商無益徒深焦灼麟病已月餘感瘴濕兼風火腹  
膨足腫食少畏風不能出營棚因防急不敢瀆聞今果  
能往雖扶病亦必行揆此情形渡兵運械實難惟有謀  
匯銀通信之法一切現仍力籌有一綫可圖必謀之容  
再奏陳請代覆奏玉麟之洞同肅號

致總署

光緒十年九月三十日午刻發

二十六日爲雲桂及各省請巨餉電奏未奉覆旨當因  
鉅款難籌之故竊又思得一策朝廷若允借款由各海  
關認還粵可向匯豐再借百萬兩濟雲桂各半當分批  
速解較北洋借他省撥尤近便以洞管見今各省防勇



數百營月餉軍火在百五十萬以外然皆防守之軍欲戰不得惟有雲桂出關數十營乃攻戰之軍尙得當敵此時宜以全力濟關外軍俾岑潘劉皆得就地添募足糧重賞庶可迅速成功總之振全局在爭越南爭越南在此數月法雖悍斷無半年內能踞全臺之理亦斷無在陸地將劉孫章曹諸軍全行擊破之理河內圍則臺灣解特再懇切上陳如蒙俞允請一面諭洞遵辦一面敕總署知照英巴使電告匯豐以期捷速伏望聖裁速行再唐景崧電宣光法增兵固守有輪船二洋三板一會黃守忠攻之現籌銀五千濟守忠並解後膛槍二千



彈百萬分濟劉黃唐三軍又解後膛槍一千七百四十枝彈百二十萬銅冒五百萬藥三萬磅濟岑軍請代奏總署來電

光緒十年十月初三日申刻到

本日奉旨張之洞兩電均悉籌濟臺越軍事具見公忠深堪嘉尙卽著分別妥速辦理在臺法兵多病煤糧軍火亦缺劉銘傳正可相機進兵克復基隆民勇可用宜加意聯絡調度並著楊昌濬設法通信力籌接濟隨時電奏張之洞奏振全局在爭越南爭越南在此數月等語甚合機宜卽著電咨雲桂疆臣共知此意所請再借銀百萬兩分濟雲桂各軍依議行該



衙門卽知照巴夏禮電告匯豐洋行此欸借到張之洞速行解運以資飽騰欽此冬

致總署 光緒十年十一月二十九日發

王孝祺本月二十七日到南甯江涸逆流全隊約臘月初十日前到龍州馮子材十八日到上思州本十營固請增募八營現趕解軍械須募齊械到略加部勒卽出關均已電催王軍老營械足舉動素穩馮軍新集械粗剽悍輕敵大約王軍宜銳進馮軍宜緩發洞當斟酌策勵復密飭欽州參將莫善喜募三營合原部兩營俟明正馮王兩軍深入卽分道襲越唐景崧現會攻宣光偪



城兵單增兩營已屢戰高州鎮張得祿報十五日法巨艦二到廉之北海又到欽州海面之烏雷皆瞭望探水捉民船泊五日乃去知東軍大舉規越欲封北海港截餉械以後改內河運較遲參考西報法新兵已到越者千六百將到越者二千三百內尙有撥赴越者數不盡實約越增二千請代奏

總署來電

光緒十年十一月二十四日酉刻到

本日奉旨曾紀澤電稱新報法新兵部會派六千兵赴越另六千續往欲乘雨潦前逼我軍出越又云擬取道陸岸繞北里華兵之後使不戰自潰西人以我



兵心易亂慣用此危道等語敵情叵測著岑毓英潘  
鼎新嚴備並力籌攻取彼如繞出北里正可斷其歸  
路出奇制勝著相機妥辦張之洞催馮子材王孝祺  
兩軍迅速到防欽此卽轉電桂撫咨雲督敬

又

光緒十年十二月初二日戌刻到

本日奉旨張之洞電奏已悉馮子材王孝祺兩軍該  
督策勵進發應需餉械設法協濟岑毓英潘鼎新遵  
疊諭悉力進勦勿稍遷延聞法用越南本地兵共六  
千人該督撫設法解散或曉諭招來以孤其勢著妥  
辦越久列藩封現在大兵助勦該國君臣自當督飭



兵民助順敵愾著彭玉麟張之洞會商岑毓英潘鼎  
新傳旨檄問責以大義令其覆陳欽此卽轉桂撫電  
咨岑督冬

致總署

光緒十年十一月二十九日發

瓊州孤懸廉欽僻遠有警報阻必需電達由廣西橫州  
舊綫歧出作綫達廉四百五十餘里由廉作綫渡海達  
瓊除海綫外水陸綫共四百九十餘里海綫五十里由  
廉作旁綫達欽一百八十餘里九月勘路購料十月運  
料十一月興工趁臺急時趕設海綫十月中旬海綫先  
成橫廉綫十二月初旬可成廉瓊綫明正中旬可成廉



欽綫明正月底可成共海陸綫千一百餘里海綫最貴  
陸綫併工運造亦稍費約需銀十萬兩有奇詳由驛奏  
謹先上聞請代奏鑒

致總署

光緒十年十二月十八日發

初四日電奏訂借德商五十萬磅以百萬作臺越用餘  
作氣礮用初六日奉電旨依議行屢與許李兩使電商  
該行九扣不減現託北洋飭盛宣懷在津與英大東公  
司行東名本特訂借五十萬零五千磅約二百萬兩周  
息九釐不計閏無扣無行用十年還每年還本息六萬  
四千磅末年結清各海關認還接巴使電卽匯銀來香



引三身之集 卷十三  
港合同稿已議妥已請北洋李相代爲閱定簽字此項  
息較省期亦寬仰懇敕總署速知照巴夏禮電英告行  
東本特電津告大東公司代理人並請電敕北洋妥辦  
匯港電敕會侯與本特將保單畫押請代奏巧

總署來電

光緒十年十二月二十一日未刻到

本日奉旨據張之洞電稱現與英大東公司在天津  
訂借銀五十萬零五千磅約二百萬兩請飭李鴻章  
妥辦滙港會紀澤與該公司行東本特將保單畫押  
等語均著依議行欽此號

致總署

光緒十年十二月十八日發



奏請 聖鑒 事



電港恐法宣戰禁兵債故急籌再匯豐前因雲桂借款延勒已電該行謂洞言伊無力該行甚慙洋商最忌無力字類乎倒閉於生理有礙故此次忽踴躍請代奏之洞文蔚同肅巧

總署來電

光緒十年十二月二十一日未刻到

本日奉旨據張之洞等電稱向滙豐再借五十萬零五千磅約二百萬兩照舊歲九釐加閏分十年還等語均著依議行該衙門知道欽此號

致總署

光緒十年十二月二十一日發

粵濟臺軍火三批皆民船第二批本月初五日到第三



批初七日亦到遇法船旗後礮臺開礮護之得免俱有  
信來第一批無到信亦無他耗接吳鴻源函十一月十  
六日到臺灣府添募土勇三營前數日港洋人報聞臺  
北法新添兵內變不審確否孤拔到越無確信前敵探  
法虜有二十三四日分犯諒山之信已飭馮王兩軍挑  
隊相機策應請代奏馬

致總署

光緒十年十二月二十三日發

據唐景崧報稱十五日景崧所部陸續截擒逸賊二百  
餘人訊供十一日之戰五晝中礮斃又斃一晝二名四  
晝一名教匪數百景崧與丁槐何秀林督攻南門礮臺



滾草而進午刻至其濠邊丁軍先入據之賊潰死傷無算粵軍都司鄒培懸礮城西北角山巔去城十丈轟擊洋樓賊不能立足攻擊最得力景崧槐秀林督隊力攻未撤隊劉永福軍亦來助擊其竄逸之賊被粵軍生擒數十名十七日雲軍運開花大礮至粵軍渡河開路懸於對岸山巔擊城頃招出教匪甚多皆宵之虜勢已孤可望得手等語已電飭招降脅從乘勝速拔堅城請代奏毓英之洞同肅漾再屢接探報俱稱唐景崧勇畧過人將士感奮岑奏亦有景崧奮不顧身有膽有識之語此次督攻宣光以少卒攻堅敵實爲難得可否懇恩嘉



獎數語以勵戎行請代奏漾

致總署

光緒十年十二月二十三日寅刻發

龍州報二十廿一兩日法大股攻蘇軍接戰兩日互有  
傷損已電飭馮子材派各營出東路那陽車里助王德  
榜王孝祺裝械日內始到已飭挑四營出中路諒山板  
峒助蘇元春接西電廿一日法有受傷兵二百昇回河  
內請代奏漾

致總署

光緒十年十二月二十日巳刻發

港到法船二泊口外窺粵之形已著聞南北洋七艘已  
到閩法船亦到馬祖澳其意必欲先毀華船竊謂閩洋



難戰緣福州口狹廈門無內口皆無收泊處戰則無把握不戰遙泊有船何益我船少宜慎惜不如令駛來香港口外泊汲水門以北法兵船煤糧船數艘過則出截之大隊船來則收入虎門與戰口門內寬廣縱橫如意有礮臺護之船臺互援我據勝勢永爲法梗護粵護船斷接濟三義合而爲一諸將所言皆同請敕左李兩相如法船無攻閩意卽飭七船速來粵請代奏有

此電并致福州

左中堂天津李中堂未加數語云頃已電奏特奉商如以爲然卽速飭辦盼復餘同

致總署

光緒十年十二月二十五日發

劉督辦催吳宏洛渡臺奉旨令洞籌奏此事甚爲難守



臺不比行隊長洲最要將領尤難方恭未勝此任法屢有窺粵信未敢輕舉與彭倪熟商移沙路守將提督蔡金章守長洲抽湘將劉樹元接守沙路添募湘勇兩營令吳將礮臺弁勇酌留二三百惟兩臺交替船到總需十數日已定議正擬覆奏昨接閩電法船八到馬祖澳今日接港密探法船二到港口外與法領事謀擾粵孤拔到閩西電言法因臺病多術窮撤圍擾他口岸是臺圍已鬆粵防正急無抽動理擬請暫緩數日局勢定再籌酌方恭五營十五日已齊備候船然劉旣不願重費無益廉州前告警請兵卽派此五營赴欽州旣爲廉援



兼爲參將莫善喜後路以便莫進兵入越請代奏有

致總署

光緒十年十二月二十六日發

訪得滬泰來行有八生車礮九十三尊各帶彈四百器  
具全三箇月到議定每尊一千三百四十兩共十二萬  
餘兩此等精礮大批平價極難遇北方陸戰利器謹已  
飭委員惲寶善立合同由粵付定銀五萬兩此數可供  
三大營用明年北防必嚴擬請分給津軍及曹克忠張  
曜各營必得力仰懇電敕南洋暨上海道將合同驗收  
礮到由北餉付價請代奏宥

致總署

光緒十年十二月二十六日發



疊接龍電法酋調河內山西北甯之兵來犯十九日向  
車里攻王德榜營半途折向谷松攻蘇元春營二十至  
二十三三日晝夜苦戰傷亡太多撤回屯諒山前軍屯  
威坡前聞敵警已疊飭馮子材王孝祺兩軍速進馮軍  
原議出東路那陽本紮思陵隘口外正前進赴車里聞  
警馮已調入營全改向諒山赴援王軍裝械廿二日甫  
到據報已挑兩營赴諒又飭續挑兩營出關惟無糧難  
行由西軍暫爲通融馮餘兩營王餘四營並桂防兩營  
顧南關後路請代奏宥

致總署

光緒十年十二月二十八日發



疊據王德榜報探聞蘇軍接仗卽留八營守車里令提督楊文彪率四營出崑園截賊援蘇廿二日將至邱岳途遇匪千餘運軍火開槍掩擊匪驚棄軍火六七十擔而走正追擊賊援至救護軍械戰且走我軍擊斃多名紮福勝廿三日又截殺數百現奉調由那陽回顧諒等語復據龍州探報亦云王軍由福勝襲敵後路軍火敵始退現蘇軍紮威坡馮軍紮峒樸王軍紮那陽等語洞三日內屢電飭馮力顧德榜王孝祺力顧諒山現馮軍所屯峒樸西距威坡東距那陽均數十里何路有警卽援何路刻下孝祺已親率隊赴諒並令馮設法招徠從



賊教匪懸優保重賞勵諸軍請代奏勘

總署來電

光緒十一年正月初三日到

本日奉旨李鴻章潘鼎新電稱法衆上犯日夜鏖戰等語諒山軍情緊要潘鼎新身臨前敵王德榜王孝祺均著聽候調遣以一事權馮子材著幫辦廣西關外軍務所統各營亦歸潘鼎新調派該撫暨該幫辦等務當和衷協力迅速圖功儻各軍不遵調度卽嚴參治罪欽此江

致總署

光緒十年十二月二十八日發

頃電旨恭悉法六船忽閩忽滬自是來尋我船刻聞又



南駛我南洋五船非甚堅北洋二快船較精礮較大又有德將必須有此二船合隊戰方有把握朝鮮事漸定目前不致遽與倭戰仰懇敕北洋飛調此兩船南下七船合隊拒戰倭有事再調回我船艱貴設有損敵更無忌至船赴何處爲宜俟與李左會商管見迫切請代奏  
勘

致總署

光緒十年十二月二十九日發

頃接左相電云據金陵電南洋五船被法四兵輪圍困温州石浦裏港等語查輪船由滬赴閩有內海一路傍山行較淺其大鐵甲不能行所以止言法輪四隻其鐵



甲當是停在外海洞管見此時宜急調北洋快船二艘  
赴援亦由內海行赴溫內外夾擊庶易得手伏望敕北  
洋速籌妥辦是否有當恭候聖裁請代奏鑒

致總署

光緒十一年正月初三日發

疊接潘撫及李秉衡等電廿九日法至諒蘇軍焚城退  
桂軍現如何布置無從深悉馮子材現有共十營其八  
營本在前敵東路現據報與李秉衡等商酌止帶一營  
駐鎮南關招集潰勇留一營彈壓龍州王孝祺報現紮  
關外由崖備敵來邀擊已屢嚴飭設謀力戰斷不准不  
接仗而入關至馮部八營據報調回扼南關是否潘調



引之集卷之十一  
已電詢竊思馮軍原議由東路進電奏陳明在案若全  
助守關東路門戶無阻敵可由上思州拊東省欽廉之  
背現飭馮軍八營仍紮東路扼勦王軍協桂軍顧南關  
一路是否合宜請旨遵行近聞法添兵前數日到新加  
坡分赴臺越號稱萬四千大約七八千人已飭莫善喜  
陳榮輝兩軍由欽州疾進以分敵勢請代奏江

總署來電

光緒十一年正月初五日到

本日奉旨聞諒山失事曷勝憤懣著潘鼎新將情形  
迅卽電奏該撫與蘇元春馮子材當督軍擇要穩紮  
激勵將士迅速進取儻不能振奮圖功貽誤大局自



問當得何罪王德榜軍曾否接仗嚴飭實力會勦王  
孝祺率隊赴諒現抵何處著催令進兵前據岑毓英  
電稱宣光旦夕可拔近日戰事若何未據電奏法如  
盤踞諒山計必分兵救宣滇軍垂成之功恐將掣動  
著飭各軍力將該城攻克掃蕩而前以分敵勢一面  
卽行電聞滇粵各軍餉械張之洞力籌接濟毋任缺  
乏欽此歌

又光緒十一年正月初六日到

本日奉旨諒山失事後據李鴻章轉電有法至巴平  
初三擊退之語稍慰區系潘鼎新現駐何處當飭馮



子材楊玉科等軍擇要穩紮力遏敵氛一面激勵將士招集散勇重加整頓以期保守邊隘轉敗爲功王德榜王孝祺暨馮子材所統各營前已有旨歸潘鼎新調遣張之洞擬令馮子材顧東路之說卽著潘鼎新通盤籌畫相機調度湖南募成八營著卞寶第飛咨龐際雲速撥六營揀派得力統領卽日趕赴廣西關外助勦廣西軍餉著鄂湘兩省截留京餉無論何款迅速籌解張之洞於借款內無論已得若干迅卽分濟滇粵各軍以應急需其廣西軍械并著源源接濟該督電稱已飭莫善喜陳榮輝兩軍由欽州疾進



并速催方恭五營一併赴欽以厚兵力欽此卽轉電  
滇桂魚

致總署

光緒十一年正月初九日申刻發

前奏准借大東公司五十萬零五千鎊備臺越氣礮用  
疊接會電東司礙法不願借茲改與匯豐議定再借五  
十萬鎊照粵新借五十萬零五千鎊辦法年息九釐加  
閏十年期前五年還利後五年本利并還各省關還各  
海關保蓋粵關粵藩印又擬請由粵代川借鮑餉百萬  
兩利息期限作保與匯豐兩款同已與倫敦議妥鮑款  
詳另電奏內如蒙允准請敕總署照巴使電港立約提



銀法禁英借兵債匪豐言只借一次與商妥新借各款  
共一合同分注約上曾電東司勸我速定事急請代奏  
佳

致總署

光緒十一年正月初九日申刻發

去臘廿二日奉電旨令於借款內解二三十萬濟鮑軍  
焦急無措查粵本省借除還前欠本利六十萬止得百  
四十萬用鉅日久臺越氣礮之五十萬鎊軍多用急再  
抽濟鮑少分無益多分兩誤若不撙節勻用以後束手  
朝廷因鮑已行撤勇不及懇籌專餉現另借匯豐百萬  
兩利息期限作保與現議匯豐款同擬請旨嚴切限定



鮑軍月餉數大約每月不得過十萬粵解借款八萬川  
供二萬加軍火各費此款足支鮑軍一年如數月凱撤  
餘款候部撥用此係粵代川借款歸川還分爲十年川  
力較紓較之責川現供鉅款尙易辦抑歸各省關還統  
請聖裁至照巴使只重在各關保總之鮑餉宜限以月  
不徒限以營不然百萬難支數月旣慮譁潰亦患漏卮  
再川現認月解鮑若干外省有無協款鮑奏何日自何  
處啟行帶幾營祈敕總署查明電洞知以便籌措粵接  
黔咨鮑於十一月廿一日自夔行請代奏佳

總署來電

光緒十一年正月十三日丑刻到



本日奉旨張之洞電稱另借匯豐銀百萬兩濟鮑超軍餉等語著該督卽與匯豐借定仍由各海關還至鮑超月餉如何限定四川能否供支此款如何撥用著戶部速議具奏候旨遵行鮑超帶二十一營於十二月初三日自瀘起行欽此文

致總署

光緒十一年正月十一日發

疊據唐景崧報雲軍作地道粵軍作雲梯草網攻宣光景崧傳書招城匪去臘廿八日地雷發城未動諸軍負傷力攻敵於城市嶺脚掘窟樹柵備巷戰廿九日五鼓丁槐發一雷毀城數丈敵死拒缺口正月十二日晚崧



據城北土阜築營闕城攻擊以鄉音誘從匪客教匪投  
出百餘皆釋去偷渡者任其逸寇極悍連日雲粵各軍  
猛攻苦戰傷亡不退兼旬寒雨甚苦幸皆用命城內有  
哭聲現又在城北作地雷等語探援寇三千將到慮雨  
漲輪來急飭攻招并行尅期得城請代奏毓英之洞同  
肅真

致總署

光緒十一年正月十一日發

初三初六日三次電旨恭悉馮王兩軍已屢飭聽潘調  
度冬臘兩月解過桂軍士乃得槍千五百毛瑟各種彈  
百七十萬聞諒急電飭龍局截留唐劉槍千濟桂現又



挪粵省用黎意精槍千彈百萬并新到士乃得槍千彈  
百萬皆濟雲械亦併湊解借款提少湊墊十二萬兩分  
解雲桂惟苦道遠去冬雇民船濟臺軍火頭批於臘月  
十一日交嘉義縣收計三批均到有信來現仍兼籌運  
械匯餉毛瑟聞日內可到覓得輪卽解請代奏真

致總署

光緒十一年正月十五日發

十三日電旨恭悉已嚴催馮子材自除夕電潘及馮王  
卽云兩軍悉聽潘調度如諉避請潘効斷不遙制續十  
餘電略同皆軍法嚴參應攻應守如何均聽潘酌等語  
馮現止十營李秉衡電初四日新募六營十四秉衡電



尙無裝械左江道電馮後八營軍火十二日方到南甯  
待雇船馮先以八營照奏案由東路進那陽卽法攻王  
德榜之路谷松急潘七日十調屢更改先遣攻敵繼近  
紮中遠擣又回援奔馳不及馮以二營駐龍募新待械  
諒陷龍州警桂無軍馮素有人望潘李商駐關鎮擾集  
潰眾賴之馮欲調八營入關洞詢是否潘意潘答調關  
并無此議洞遵旨嚴催馮軍不戰不准入關責馮親往  
督戰馮遂行其舊營前紮派站距威坡諒山皆六十里  
近潘調不悉到何處其新營秉衡借械以餘營守龍五  
營扼憑祥潘現駐海村憑祥在海村之前四十五里距



龍九十里舊營在越新營粗成已在前路似以前無玩  
延事聞潘與人言有馮子材王德榜坐擁二十八營飛  
催不至事權不一掣肘萬分等語馮前數日實無十八  
營洞竭粵東全省之力以助桂濟餉濟械濟兵飭聽潘  
調似無人掣肘潘因寇熾懼重譴惶恐焦急故如此措  
詞或可原朝廷寬大令戴罪圖功仰見聖明若責之急  
則無措總之蘇元春陳嘉實是良將雖敗可用馮子材  
老成得軍民心秉衡電及桂越公論同竊謂潘此時宜  
責已恕人方能同心救危若老將寒心忿兵一逞後難  
維持潘處艱危洞力望補救斷不肯苛摘惟邊事重大



道遠以後潘奏求朝廷詳察虛實請代奏咸

致總署

光緒十一年正月十七日已刻發

廉防高鎮張得祿電欽州報正月初三法三輪駛入岳  
山港洋面又四輪泊越界先安州用民船載兵登州岸  
聞將占芒街等語芒街與欽屬東興接教民最多東興  
有我防營此必法見欽防增兵知將規越故來防禦諸  
軍皆係急就關外軍退事機已晚只可變攻局爲守局  
有機再圖進取免致孟浪引敵已飭莫善喜陳榮輝等  
擇要穩紮嚴防遊擊方沿五營日內可到廉沿係改派  
併聲明請代奏玉麟之洞文蔚同肅霰



致總署

光緒十一年正月十九日未刻發

據唐景崧等報初十日五鼓景崧與丁槐等各選募敢死士督攻宣光城西缺口地槽窄後隊未齊頭隊過勇先登敵彈如雨彼此血戰粵軍登城者三十人傷亡過半哨官鄒全鴻受兩傷斃賊數十雲軍攻入城者或傷或亡擊斃長鬚法酋一天已明撤隊暫息聞援寇板船三十艘已至端雄擬再懸重賞急攻再去臘廿八日之戰雲軍遊擊何天祥守備王世興陣亡等語已飭李永福黃守忠等力扼端雄援寇請代奏毓英之洞同肅皓

唐主政來電

光緒十一年正月十四日丑刻到



宣城至今未下而愈偪愈緊雲軍另辦地雷未成卑部於北城下拔盡虜所置竹籤木椿聯布小壘疑積齊城搶登近城土阜築礮臺用槍俯擊城敵虜急在山背關地槽推大礮連轟無損近城築壘甚難堆草蔽身衝彈運鋤架木一壘成賞銀四百壘距城無術可破太近難送雷輒被擊每以布裹雷遞擲城下兵皆如此虜奈我何得手則軍心壯不敢恃也虜迭抵死出撲俱擊退初三日

又光緒十年正月十四日寅刻到

本日晨雲軍轟地雷卑軍滾草綑架雲梯敵礮太密



登而復卻聞諒山不守援敵將來憂急之至卑軍伏城下未收隊督令急攻加懸重賞冀速克城聊支大局初八日

致總署

光緒十一年正月十九日未刻發

虜大輪已被鎮海臺船合力擊傷挂停礮旗而遁是彼船傷重目前必不能戰竊謂此時宜速調北洋快船兩艘輔以兵船三艘飛速南下與我三船合勢上則蹙之於舟山次則援三船以出港八船結隊擇要屯泊相機戰守局勢便活若遲回不決旬日後或另添大輪或修整完好必再來攻三船終孤此機似不可失伏懇宸裁



請代奏皓

總署致北洋電

光緒十一年正月二十一日到

本日奉旨張之洞電奏鎮口法輪受傷而遁目前必  
不能來宜速調北洋快船兩艘輔以划船三艘飛連  
南下與我三船合勢相機戰守等語開濟等三船在  
鎮口依傍礮臺合擊法船頗爲得力放洋禦敵兵力  
尙單如調北洋戰艦前往會合聲勢自壯惟法人有  
續添兵艦之信中途設遇戰事尤須加意慎重著李  
鴻章妥爲籌畫卽行電奏欽此馬

致總署

光緒十一年正月二十四日未刻發



援寇至端雄欲衝左育以救宣光毓英已飭何秀林劉永福迎擊覃修綱楊國發劉興截後援寇如殲宣光必潰惟桂軍已入關恐諒寇分據牧馬斷官軍後宜扼守毓英查鮑軍萬餘已到雲省雲軍糧運艱難士無隔宿食若鮑軍同走一路更恐饑潰擬請鮑軍到開化出保樂往防牧馬保樂糧多如桂軍出攻新山亦可夾擊免同雲軍爭糧誤事焦灼萬狀電商之洞籌奏之洞查牧馬卽高平省爲龍州赴宣光要道雲粵各軍恃此通氣保樂係越土州屬高平距雲界不及二百里寇據諒後必攻牧馬已有探報洞亟與潘撫商派營護此正苦新



挫兵單若鮑由開化東行趨保樂出高平相機進取或  
夾攻諒山或由中路取太原甚便鮑軍得糧桂軍得援  
雲軍免擾唐軍通後路四善皆備岑督所議極當謹合  
詞請旨裁奪飭鮑遵行請代奏毓英之洞同肅敬

致總署

光緒十一年正月二十七日戌刻發

廉欽緊急營新將少分割力單相距數百里又無宿將  
統攝敵至難恃省垣無將可派無軍可撥屢接西報西  
電皆云法廷定議攻廉或由北海或由龍門登岸欲襲  
南甯斷桂軍後路麟等晝夜籌思惟有急調馮子材率  
十營回援廉欽以八營紮上思州隘口上思在欽龍之



間東西相機策應出隘卽是越境有機仍可進兵馮回至廉欽眾情必定其軍自救鄉里當可得力若不調回廉欽有變軍心必搖禁之不止竊思東軍宜先保東境爲上從井救人兩無所益廉郡視龍州尤近尤要旣固東省門戶兼保西軍後路於桂仍屬有益南關一帶尙有王孝祺八營相助王德榜已至關下此時大勢似只可保境堅守謹合詞請旨遵行如蒙俞允一切進退緩急當電馮聽其酌量不爲遙制請代奏玉麟之洞文蔚同肅沁

致總署

光緒十一年正月二十九日亥刻發



疊據唐景崧報十一日何秀林復發地雷忽大雨城未動雲粵兩軍分衝缺口先鋒隊已登城敵槍礮無隙難進粵軍遊擊賴朝榮陣亡賴未戰已託子誓死弁伍義廷姚紀昌見事不濟不欲回營死城中粵軍死城上者十餘人已入城而爲賊所截戰沒城中者十四人雲軍亦有傷亡十三日四鼓景崧丁槐何秀林復分攻缺口傷亡多撤退粵軍帶隊參將鄧有忠弁趙全鴻傷汪鼎臬覃啟發重傷客匪多逸出計初十十一十三等日三次猛攻斃賊甚眾兩軍傷亡精銳太多粵軍尤多十六日援寇大隊至左育攻劉營劉永福血戰一日用地雷



殲賊百餘擊斃百餘寇襲吳鳳典營各營抄擊被隔永  
福不支遂敗現退保浪泊景崧率銳卒數百馳援未至  
劉已敗教匪乘機擾三江口糧道雲粵諸將議援至劉  
挫我軍瘡痍之餘腹背受敵又皆缺糧彈勢難猝爭不  
如全師暫退就糧圖再舉現景崧紮霑化丁紮寒猛何  
紮同安等語查諸軍攻宣數月血戰無數將士損傷卒  
被援寇撓壞實堪憤恨今賊燄方張惟有全師養銳俟  
有機再圖進取請代奏毓英之洞同肅豔

致總署

光緒十一年正月二十九日辰刻發

法兵日增兩粵並急港忽戒嚴敵謀叵測良將不多實



難分布查有本任鄖陽鎮總兵龔繼昌謀勇兼長屢立戰功現在湘統十餘營防辰沅岳一帶厯任督撫倚重見其與人書自願來粵東征勦擬懇 聖恩調該鎮酌帶數營速來兩廣湘墊一兩月餉催行粵還俟行至梧州時如東事急則順流來廣西事急則溯流赴龍北海急則由南甯赴廉臨時斟酌調遣赴東則由東省調度供餉赴西則由西省調度供餉湘將在籍者多如黃少春之類皆可接統防營尙易籌所以請調該鎮者一取其自告奮勇一取其軍伍現成路近來速一取其與東省湘統領王永章西提蘇元春皆同軍相契將來無論



赴東赴西俱可聯絡出力伏祈恩准電敕鄂湘督撫飭速來粵又常德協副將鄧第武勇幹有爲與龔相得并請飭調隨龔來粵請代奏玉麟之洞文蔚同肅勸

致總署

光緒十一年正月二十九日辰刻發

粵省防急事繁知兵者少委任乏人艱苦萬狀查降調浙江臬司陳寶箴才長識遠軍事優練前經湘撫奏調辦理營務蒙允該員以病辭該員與現在兩粵客將率皆契合擬調來粵必能聯絡諸將又查丁憂前直隸候補道李興銳志正才堅精於機器槍礮實爲海防先務仰懇天恩電敕江西鄂湘督撫飭兩員迅速來粵差委



以資臂助勿令辭緩大於防務有益需才甚急謹電奏  
請旨請代奏玉麟之洞文蔚同肅豔

總署來電

光緒十一年二月初二日到

奉旨彭玉麟等電奏粵防喫緊請調總兵龔繼昌酌  
帶數營迅即赴粵湘鄂墊一兩月餉由粵歸還並調  
副將鄧第武隨往等語著卞寶第龐際雲照所奏迅  
速辦理該軍行抵梧州著彭玉麟等會商潘鼎新斟  
酌調遣卽由該省籌給月餉另奏請調降調臬司陳  
寶箴著德馨飭令該員速赴廣東交彭玉麟等差委  
前大名府知府李興銳已有旨飭令送部引見毋庸



調往欽此

致總署

光緒十一年正月三十日午刻發

疊據唐景崧報餉彈缺乏後路阻絕請回防牧馬等語查宣光勢難再攻牧馬寇所必爭接潘撫電九葑已有賊蹤前因南關被擾龍局將唐軍餉彈改解百色此時唐軍孤懸霑化無益後路斷餉彈乏其軍必潰惟有速回牧馬助桂爲妥已飭速商岑督但左育旣擾道梗難達并令酌量情形若事急卽速拔回牧馬馮旣援廉唐回助桂先議守徐圖攻似爲穩便請代奏卅

張文襄公全集卷七十三終

黃陂蕭延年校